

清

史

稿

清史稿

列傳一百五十三

孫玉庭

蔣攸銘

李鴻賓

孫玉庭字寄圃山東濟甯人乾隆四十年進士選庶吉士授檢討五十一年出爲山西河東道父憂去服闋補廣西鹽法道嘉慶初就遷按察使歷湖廣安徽湖北布政使舉發道員胡齊崙假冒軍需詔嘉之七年擢廣西巡撫調廣東安南國王阮光纘爲農耐阮福映所逼叩關乞內避命玉庭馳赴廣西察辦福映已滅光纘遣使納款玉庭疏陳其恭順請受之尋福映請改國名曰南越仁宗疑之玉庭言不可以語言文字阻外夷嚮化之心其先有古越裳地繼併安南若改號越南亦與中國南粵舊名有別乃報可廣東海盜日橫玉庭議防急於勦請增兵嚴守口岸禁淡水米糧出海以制之尋調廣西十年復調廣東時總督那彥成專意招撫玉庭意不合疏陳其弊謂盜非悔罪特爲貪利而來官吏貪功不惜重金爲市陽避盜名陰搜盜實廢法斂怨莫此爲尤上聽其言那彥

成由是獲罪十三年英吉利兵船入澳門總督吳熊光但停貿易未遣兵驅逐
上斥畏憚罷熊光調玉庭貴州尋百齡至粵追論熊光且劾玉庭不以實入告
坐罷歸已而予官編修在文穎館行走十五年授雲南巡撫兼署雲貴總督調
浙江二十年英吉利貢使不願行跪拜禮廷議以其倔強遣之會玉庭入覲面
奏馭夷之道妄有干求當折以天朝之法度歸心恪順不責以中國之儀文反
覆開陳上意乃解二十一年擢湖廣總督未幾調兩江漕鹽河爲江南要政日
臻疲累玉庭久任封圻治尙安靜整頓江西湖北引岸緝私籌款生息津貼屯
丁減省漕委隨事爲補苴之計稍稍相安宣宗即位特加太子少保銜時用尙
書英和言清查直省陋規立以限制下疆臣議久遠之法玉庭疏言自古有治
人無治法果督撫兩司皆得人則大法小廉自不虞所屬苛取病民非然者雖
立限制仍同虛設弊且滋甚各省陋規本干例禁語云作法於涼其弊猶貪禁
人之取猶不能不取若許之取勢必益無顧忌迨發覺治罪民已大受其累府
廳州縣祿入無多向來不能不藉陋規爲辦公之需然未聞準其加取於民垂

爲令甲者誠以自古無此制祿之經也伏乞停止查辦天下幸甚疏入詔褒其不愧大臣之言道光元年授協辦大學士仍留總督任是年入覲與王瀾堂十五老臣宴帝詢淮鹽疏銷之策王庭言漢口爲淮南售鹽總岸向來船到隨時交易是以暢銷自乾隆中立封輪法挨次輪售私鹽乘間侵越因臆陳六害請復舊章從之又言漕糧浮收不能禁革不如明與八折爲便御史王家相奏言事類加賦侍郎姚文田湯金釗亦論之事遂寢然州縣困於丁費浮收仍難禁絕胥吏上下其手專累良懦因王庭議不行疆臣不敢復請至同治初始定漕耗卒如玉庭議四年拜體仁閣大學士留任如故會高家堰決河督張文浩遣戍部議上庭革職詔念前勞寬之留任尋復以借黃濟運無效褫職予編修休致戶部復劾其不行海運而河病運阻責償滯漕剝運費十之七命留滄運河工竣回籍十四年重宴鹿鳴加四品頂戴尋卒年八十有三子善寶以舉人廩生授刑部員外郎官至江蘇巡撫瑞珍道光三年進士由翰林官至戶部尙書諡文定孫毓漑道光二十四年一甲一名進士官至浙江按察使毓汝亦以一

甲二名進士官至兵部尙書自有傳曾孫楫咸豐二年進士翰林院庶吉士官至順天府尹四世並歷清要家門之盛北方士族無與埒焉

將攸銛字礪堂漢軍鑲紅旗人先世由浙江遷遼東從入關居寶坻乾隆四十九年成進士年甫十九選庶吉士授編修嘉慶初遷御史敢言有聲受仁宗知五年出爲江西吉南贛道署按察使八年廣昌齋匪廖幹周作亂攸銛率兵平之疆臣上其功會丁母憂去十年特起署廣東惠潮嘉道歷江西按察使雲南布政使十四年調江蘇就擢巡撫調浙江擢江南河道總督以不諳河務辭詔回原任十六年擢兩廣總督嚴於治盜遴動幹文武大員駐廣肇詔速諸郡居中之地分路搜截飭州縣官赴鄉勸導耆老使境內不得藏奸舉劾嚴明吏皆用命歷禽匪盜七百餘名自首者許自新特詔褒獎十八年應詔陳言略曰我朝累代功德在民而亂民愆不畏法變出意外此皆由於吏治不修所致臣觀近日道府州縣貪酷者少而委靡者多夫閭冗之釀患與貪酷等竊以爲方今急務莫先於察吏而欲振積習必用破格之勸懲凡貪酷者固應嚴參平庸者

亦隨時勅休改用勿俟大計始行覈辦其有勳能者即請旨優獎果道府州縣得人則禍亂之萌自息次年又上疏曰道府由牧令起家者十之二三由部員外擢者十之七八聞近來司員少卓著之才由於滿洲之廢生太易漢員之班太多請飭部臣隨時考覈其不宜於部務者以同知通判分發各省使練民事部曹亦可疏通今之人才沈於下位者多矣請飭大臣薦達擇其名實相副者擢用抑臣更有請者任事之與專擅有義利之分若任事而以專擅罪之人皆推諉以自全矣協恭之與黨援有公私之別如協恭而以黨援目之人且立異以遠嫌矣此近今之積習爲大臣者當力除之至翰林儒臣務在崇正學黜浮華養成明體達用之才不必以文章課殿最科道爲耳目之官數陳能否得體糾劾是否爲公詢事考言難逃洞鑒其有卓越清正者當由京堂而擢卿貳與翰詹參用用人之道因才因地因時臣下無可市之恩君上有特操之鑒人無求備政在集思此之謂也疏入上嘉納之英吉利兵船入內洋攸銛飭停貿易乃聽命引去請禁民人爲洋人服役洋行不許建洋式房屋鋪商不得用洋

字店號清查商欠不準無身家者濫充洋商及內地人私往洋館並如議行商人負暹羅國貨價以官錢代償既而貢使來繳還攸銛以奉旨頒給乃示懷柔不得復收回却之詔嘉其得體二十二年調四川總督四川兵故驕縱一裁以法民多帶刀劍禁鄉村設鎗製兵刃城市編牌取結有犯連坐以義倉租息助灌縣都江堰歲修禁派捐累民重修文翁石室興學造士言官請禁非刑飭屬銷毀違法刑具而嚴戒縱匪不得博寬厚虛名貽閭閻實害二十四年率土司頭目入都祝嘏賞賚有加時因慶典普免天下積欠錢糧獨四川無欠可免詔嘉其撫綏有方予優叙二十五年仁宗崩入謁梓宮宣宗諭褒爲守兼優加太子少保道光二年召授刑部尙書尋授直隸總督值水災請截南漕四十萬石賑款先後二百萬兩踰年賑事竣時方治畿輔水利命侍郎張文浩莅其事尋以程含章代之攸銛與合疏言東西兩淀大清永定子牙南北連五河及天津海口千里隄不可緩之工請部撥銀一百二十萬兩又疏陳千里隄章程規復兩淀堡船袂夫移改管河員弁駐所添建巡防堡戍並如議行命協辦大學士

仍留總督任五年拜體仁閣大學士充軍機大臣管理刑部以回疆平加太子太保七年授兩江總督疏言總督於河務非專責與河臣同治徒掣其肘請毋庸駐清江浦從之時清水不能敵黃漕運屢阻攸銛初在浙不主海運至是見河漕交困試行海運便利遂請繕行並預儲銀六十萬兩備河運盤壩之用廷議方主倒塘濟運法且疑其畏難便私不許攸銛疏辯極言倒塘之不足恃上終不以爲然姑許海運而禁言盤壩未幾海運亦能以張格爾就禽追論贊畫功晉太子太傅黃玉林者鹽梟巨魁以儀徵老虎頸爲窟穴長江千里呼吸皆通詔責嚴捕玉林投首乞捕私自効十年攸銛病乞假滿召回京供職而玉林復圖販私攸銛疏請嚴治發遣新疆尋復慮其潛回滋事密請處絞詔誅玉林切責攸銛苟且從事嚴議褫職加恩降兵部侍郎未至京卒於途優詔軫惜依尙書例賜卹攸銛精緻強識與人一面一言閱數十年記憶不爽勇於任事不唯阿尤長於察吏薦賢如不及所舉後多以事功名節著子爵遠官至貴州巡撫自有傳

李鴻賓字鹿萃江西德化人嘉慶六年進士選庶吉士授檢討遷御史給事中十八年巡視東漕會林清之變數疏陳時政利弊又以山東河南直隸毗連之地頻年遭兵條上善後事始受仁宗知命借河督吳敞巡撫同興按河督李亨特貪劣不職狀得實以聞十九年超授東河副總河時微山湖蓄水盡涸運河淤塞鴻賓自巡漕時講求疏泉濟運之策至是疏論上游湖水通暢澇蓄充盈漕運無阻被褒獎命赴睢工會同吳敞塞河二十年擢河東河道總督由諫官不三年而膺方面爲時所罕尋丁母憂賜金治喪子諭祭異數也服闋署禮部兵部侍郎命赴河南山東讞獄並察黃河運河湖水情形二十三年署廣東巡撫二十四年授漕運總督復調河東河道總督河決蘭陽儀封命偕尙書吳敞治之鴻賓專駐儀封會北岸馬營壩復決合疏言馬營土質沙鬆河溜尙勁未能遽定壩基被詰責遂自陳不勝河督之任詔斥其見吳敞辦工遲緩慮同獲咎預爲地步褫職予郎中銜留河南專司大工錢糧二十五年命營山東運河事務兼署山東巡撫專駐張秋籌備釐運事尋授安徽巡撫道光元年調漕運

總督二年擢湖廣總督初湖廣行銷准鹽用封輪法大商壟斷小商向隅甫改開輪又有跌價爭售之害鴻賓請設公司僉商經理無論鹽船到岸先後小商隨到隨售大商按所到各家計引均銷試行兩月後販運踴躍著爲令時議折漕以資治河鴻賓疏言徵收折色弊資叢生莫若令民間完交本色由州縣賣米易銀轉解河工詔以易啟抑勒捏價加收平色諸弊未允行調兩廣總督廣東通商久號爲利藪自嘉慶以來英吉利國勢日強漸跋扈故事十三行洋商有缺十二家聯保承充虧帑則攤價英領事類地知洋行獲利厚欲以洋厮容阿華充商諸商不允乃賄鴻賓得之類地曰吾以爲總督若何嚴重詎消數萬金便營私耶於是始輕中國官吏容阿華尋以淫侈耗資逃勿獲官帑無著不能責諸商代償乃以抽分法爲彌補衆商藉以漁利夷情不服日益多事鴉片流行日廣漏銀外洋鴻賓屢疏陳查禁之法及禁種罌粟並增築虎門大角礮臺以資控御而奉行具文未有實效十年協辦大學士仍留總督任十一年崖州黎匪亂鴻賓駐雷州令提督劉榮慶總兵孫得發勦平之給事中劉光三奏

廣東匪徒立會滋擾鴻寶疏陳無三點會名目惟搶劫打單勒索民財根株未絕隨時訪拿準自首免罪請廣潮肇嘉諸府州山場荒地令無業游民報墾永不升科庶衣食有資免流匪僻如議行入覲賜花翎十二年春湖南搖趙金龍倡亂廣東連州搖聞風蠢動遣兵防勦五月鴻寶赴連州三路進兵雖有斬獲兵弁傷亡多疏請俟湖南事竣進勦詔斥任賊蔓延提督劉榮慶衰庸不早糾劾嚴議革職改留任命尙書禧恩等由湖南移師赴粵勦辦禧恩言粵兵多食鴉片不耐山險鴻寶陳奏不質褫職速治遣戍烏魯木齊十四年釋還予編修家居久之二十年卒

論曰宣宗初政勵精求治孫玉庭蔣攸銛並以老成膺分陝之寄大事多以諮決其時鹽河漕皆積困玉庭持重晚稍模稜攸銛直行己意眷注遂衰然其汲引人才識量遠矣李鴻寶初以建言驟起後乃匱篋不飭貽海疆隱患三人皆不能以功名終公私之殊不可概論也

清史稿

列傳一百五十四

長齡

那彥成

字容安

客星

玉麟

特拔舉保

長齡字懋亭薩爾圖克氏蒙古正白旗人尙書納延泰子惠齡之弟也乾隆中由繙譯生員補工部筆帖式充軍機章京擢理藩院主事從征甘肅臺灣廓爾喀累擢內閣學士兼副都統嘉慶四年授右翼總兵五年赴湖北勦教匪爲領隊大臣數敗高天升馬學禮於川楚交界授宜昌鎮總兵又敗徐德荷文明等六年擢湖北提督署總督七年敗樊人傑曾芝秀等予雲騎尉世職以病回京歷左翼總兵出爲古北口提督九年授安徽巡撫禽蒙城教匪余連十年調山東十二年擢陝甘總督討平西甯叛番十三年坐在山東供應欽差侍郎廣興動用庫帑視職戍伊犁尋予藍翎侍衛充科布多參贊大臣十六年授河南巡撫十八年復授陝甘總督勦禽南山匪首萬五等督騎都尉世職二十一年予都統銜充伊犁參贊大臣命察治回匪圖爾邁善獄劾能將軍松筠遂代之二

十二年復授陝甘總督道光元年加太子少保協辦大學士留總督任二年署直隸總督會青海野番滋事命回陝甘遣總兵穆爾泰馬騰龍討平之賜雙眼花翎拜文華殿大學士管理藩院事召還京尋以青海奏凱後野番復渡河劫掠奪雙眼花翎三年授軍機大臣管理戶部三庫充總諮達四年出爲雲貴總督五年調陝甘改授伊犁將軍初回疆自乾隆中戡定後歲徵貢稅頗約旋懲於烏什之亂山辦事大臣縱肆激變益慎選邊臣回民賴以休息久之法漸弛莅其任者往往苛索伯克伯克又斂之回民嘉慶末參贊大臣斌靜尤淫虐失衆心張格爾者回酋大和卓木博羅尼都之孫也博羅尼都當乾隆中以叛誅至是張格爾因衆怨糾安集延布魯特寇邊道光二年逮治斌靜代以永芹亦未能撫馭四年秋五年夏兩次犯邊領隊大臣巴彥圖敗績遂益猖獗六年六月張格爾大舉入卡陷喀什噶爾英吉沙爾葉爾羌和闐四城命陝甘總督楊遇春駐哈密督兵進剿長齡疏言逆酋已踞巢穴全局蠢動喀什城距阿克蘇二千里四面回村中多戈壁非伊犁烏魯木齊六千援兵所能克請速發大兵四

萬以萬五千分護糧臺以二萬五千進戰詔授長齡揚威將軍遇春及山東巡撫武隆阿爲參贊率諸軍討之十月師抵阿克蘇時提督達凌阿等已敗賊渾巴什河張格爾以衆三千踞柯爾坪令提督楊芳襲破之大雪封山兵止未進疏言前奉旨兵分二路正兵由中路臺站奇兵由烏什草地繞出喀城斷其竄遁惟烏什卡倫外直抵巴爾昌山溝險狹戈壁數百里所經布魯特部落半爲賊煽未可孤軍深入且留防阿克蘇烏什庫車兵八千餘其延綏四川兵尙未到進剿之步騎止二萬二千兩路相距二十餘站聲息不通喀城賊衆不下數十萬非全軍直搗反正爲奇難期無失喀城邊外凡十卡皆接外夷恐賊敗遁已諭黑回約衆邀截七年二月師至巴爾楚軍臺爲喀葉二城分道處復留兵三千以防繞襲進次大河拐賊屯阿爾巴特夜來犯營卻之遂由中路進殲賊萬餘禽五千越三日張格爾拒戰於沙布都爾多樹葦決水成沮洳賊數萬臨渠橫列乃令步卒越渠鑿關騎兵繞左右橫截入陣賊潰追踰渾水河禽斬萬計又越二日進剿阿瓦巴特分三路掩殺俘斬二萬有奇追至洋達瑪河距喀

城僅十餘里賊悉衆十餘萬背城阻河而陣互二十餘里選死士夜擾其營會大風竄用楊遇春策索倫千騎繞趨下游牽賊勢大兵驟渡上游蹙之賊陣亂乃大奔乘勝抵喀什噶爾克之時三月朔日也張格爾已先遁獲其姪與甥及安集延會推立汗薩木汗分兵令遇春下英吉沙爾葉爾羌芳下和闐於是四城皆復上以元惡漏網嚴詔詰責限速捕獲六月遇春率兵八千出塞窮追遇春屯色勒庫芳屯阿賴諭各部落禽獻浩罕遣譟誘官軍入伏鏖戰幾殆僅得出險詔斥諸將老師糜餉留兵八千餘命遇春率兵入關芳代爲參贊當大軍之出密詔詢將軍參贊事平後西四城可否仿土司分封至是長齡疏言愚回崇信和卓猶西番崇信達賴即使張逆就禽尙有兄弟之子在浩罕終留後患八千留防之兵難制百萬犬羊之衆博羅尼都之子阿布都里尙羈在京師惟有赦歸令總轄西四城可以服內夷制外患武隆阿亦以爲言上切責其請釋逆裔之繆並革職留任命那彥成爲欽差大臣代長齡籌善後張格爾傳食諸部落日窮蹙長齡等遣黑回誘之率步騎五百欲乘歲除襲喀什噶爾兵

以待賊覺而奔追至喀爾鐵蓋山擊斬殆盡張格爾僅餘三十人棄騎登山副將胡超都司段永福等禽之八年正月捷聞上大悅錫封長齡二等威勇公世襲罔替賜寶石頂四團龍補服紫綬授御前大臣諸將封賞有差五月檻送張格爾於京師上御午門受俘磔於市晉長齡太保賜三眼花翎圖形紫光閣尋回京命親王大臣迎勞行抱見禮於勤政殿授閱兵大臣管理藩院及戶部三庫正大光明殿賜凱宴賜銀幣授領侍衛內大臣恩禮優渥並用乾隆朝故事時稱盛焉十年秋浩罕以內地安集延被驅逐貨產皆鈔沒積怨憤遂挾張格爾之兄玉素普及其黨博巴克等復入邊圍喀什噶爾英吉沙爾二城且犯葉爾羌復命長齡爲揚威將軍往督師會葉爾羌辦事大臣璧昌連破賊長齡令參贊哈喇阿提督胡超分路進援喀英二城賊聞風解圍遁出塞於是借伊犁將軍玉麟合疏陳善後事略曰此次入寇與張格爾不同不過烏合夷衆挾驅逐鈔沒之憾虜掠取憤無志於土地人民各自回畏賊騷掠助順守禦亦非上年甘心從逆之比此時戰緩而守急惟兵未至而賊已先逃兵久駐而賊無一

獲戰守俱無長策諸臣條奏增兵廣屯以省徵調言之似易行之實難即收效亦在數十年之後若仿土司以西四城付阿奇木伯克回性懦弱非浩罕敵苟無官兵守禦賊至必如無人之境臣等再四籌商統兵之人宜立不敗之地斯能制人而不爲人制惟有移參贊大臣於葉爾羌其地本回疆都會距喀什噶爾六站在不遠不近之間再移和闐領隊大臣備調道喀什噶爾留換防總兵一與英吉沙爾領隊爲犄角巴楚克駐守總兵一爲樹窩子咽喉鎖鑰六城相距均不過數百里於西四城額兵六千之外留伊犁騎兵三千陝甘綠營兵四千量分駐守而以重兵隨參贊居中調度新兵糧餉請於各省綠營兵額內裁百分之二歲省三十餘萬以爲回疆兵餉俟屯田有效即以回疆兵食守回疆仍撤回內地餉額又疏請招民開墾西四城閒地以供兵糈又請添設同知二巡檢五由陝甘選勤能之員任之並下廷議往復再三罷設文員減滿漢兵二千五百名新增餉需不過十萬兩各城額徵糧科可數供支乃允行以璧昌爲參贊大臣各城聽節制其辦事領隊各大臣命長齡等保奏任用浩罕懼大軍

出討乞援俄羅斯俄人拒之乃遣頭人詣軍求通商長齡責縛獻賊目釋還兵民來報願還俘虜復乞免稅並給還所沒貲財上方欲示以寬大且謂獻犯亦不足信一切允之浩罕喜過望進表納貢通商如故邊境乃安長齡駐回疆凡兩載十二年回京晉太傅管理兵部調戶部賜四開楔袍十七年以病乞休上親視其疾溫詔慰留以八十壽晉一等公爵次年卒上震悼親奠賜金治喪入祀賢良祠伊犁名宦祠諡文襄十九年命每次謁陵後賜奠其墓子桂輪襲公爵官至烏里雅蘇臺杭州將軍諡恪慎孫麟興襲爵亦官烏里雅蘇臺將軍那彥成字繹堂章佳氏滿洲正白旗人大學士阿桂孫乾隆五十四年進士選庶吉士授編修直南書房四遷爲內閣學士嘉慶三年命在軍機大臣上行走遷工部侍郎調戶部兼翰林院掌院學士擢工部尚書兼都統內務府大臣那彥成三歲而孤母那拉氏守志撫之成立至是三十載仁宗御書勵節教忠額表其門時教匪張漢湖久擾陝西參贊大臣明亮及將軍慶成巡撫永保同勦之互有隙師行不相顧是年秋命那彥成爲欽差大臣督明亮軍褫慶成永保

職速治那彥成以樞臣出膺軍寄意銳甚明亮聞其將至急擊賊敗之漢湖伏誅帝嘉其先聲奪人特詔褒美漢湖黨冉學勝亦狡悍猶在陝冬敗之五郎竄秦嶺老林又迭敗之高關峪夾嶺鳳皇山賊乘間逸入湖北河南境五年春進兵漢中遂入棧勦川匪追出棧大破之隴州隴山鎮俘斬甚衆授參贊大臣會經略額勒登保病上以那彥成隴山捷後軍威已振命兼督各路兵高天升馬學禮陷文縣踞卡郎寨乘夜渡河破之賊南竄趨松番岷州額勒登保病起合擊敗之餘賊將竄川境即陰平入蜀道也那彥成以地險不利騎兵檄總兵百祥迎擊於農安自率師回陝初那彥成西行以南山餘賊付巡撫台布繼而川賊五家營至與合欲東犯台布遣將扼之賊趨鎮安張世龍張天倫爲經略大兵所驅亦奔鎮安羣賊皆注漢北山內額勒登保追入老林賊向商維爲楊遇春所破始不敢東那彥成與會師鎮安商維賊折犯楚境上以軍事不得要領召回京面詢方略而高馬二賊入川後益張總兵施縉戰歿詔斥那彥成縱賊罷軍機書房一切差使及至召對忤旨再斥在陝漫無布置面詢兵事兩事惟

諉諸劫數未盡且有忌額勒登保戰功意擬尙書講官花翎降翰林院侍講歷少詹事內閣學士七年赴江西按巡撫張師誠被劾事未定讞兩廣總督吉慶以勦會匪被譴自戕命往鞫八年率提督係全謀平會匪條上善後著吏部侍郎擢禮部尙書九年復授軍機大臣赴河南鞫獄未畢命署陝甘總督治搜捕餘匪善後事宜手詔戒之曰汝誠柱石之臣有爲有守惟自恃聰明不求謀議務資兼聽並觀之益勿存五日京兆之見未幾調授兩廣總督廣東土匪勾結海寇爲患久不靖那彥成以兵不足用乃招撫盜首黃正嵩李崇玉先後降者五千餘人獎以千總外委銜及銀幣有差巡撫孫庭玉劾其賞盜降藍翎侍衛充伊犁領隊大臣旣而李崇玉檻送京師訊得與正嵩皆受四品銜守備劾職戍伊犁十二年復予二等侍衛充領隊調喀喇沙爾辦事大臣又調西甯平叛番擢南河副總河以荷花塘漫口合而復決降二等侍衛歷喀喇沙爾葉爾羌辦事大臣喀什噶爾參贊大臣十四年復授陝甘總督十八年河南天理會教匪李文成等倡亂陷滑縣直隸山東督馨應林清糾黨犯禁門初命總督溫

承惠往勦清既誅乃發京兵授那彥成欽差大臣加都統銜督師率楊遇春楊芳等討之迭詔責戰甚急那彥成以小醜不足平惟慮遁入太行勢且蔓延十月至衛輝合師而後進賊踞桃源集道口與滑縣爲犄角連敗之於新鎮丁樂集遇春擊破道口殲賊萬餘焚其巢藪破桃源集追道口餘賊抵滑縣文成遁輝縣司寨楊芳德英阿追破之文成自焚死親督遇春等圍滑城數旬以地雷攻拔之獲首虜二萬餘山東賊亦平捷聞加太子少保封三等子爵賜雙眼花翎授直隸總督賜祭其祖阿桂墓二十一年坐前在陝甘移賑銀津貼腳價襪職逮問論大辟繳完賠銀改戍伊犁會丁母憂詔援滑縣功免發遣二十三年授翰林院侍講歷理藩院吏部刑部尙書授內大臣道光二年青海野番甫定復授命那彥成往按邊授陝甘總督驅私住河北番族回河南原牧戡定約東緝治漢奸乃漸平五年調直隸七年回疆四城旣復命爲欽差大臣往治善後事先後奏定章程革各城積弊諸領隊辦事大臣歲終受考覈於參贊大臣又總考覈於伊犁將軍互相糾察增其廉俸許其携眷久其任期印房章京由京

揀選不用駐防除伯克賄補之弊嚴制資格保舉迴避五城叛產歸官收租歲糧五萬六千餘石支兵餉外餘萬八千石爲酌增各官養廉鹽米銀之用有餘則變價解阿克蘇採買儲倉改建城垣增卡堡練戍兵浩罕爲逆逃數所屬八城安集延即其一嚴禁茶葉大黃川卡盡逐內地流夷收撫各布魯特待其款關求貢然後撫之詔悉允行張格爾既誅加太子太保賜紫韞雙眼花翎繪像紫光開列功臣之末浩罕匿張格爾妻孥詐使人投書伺隙那彥成禁不使與內地交接絕其貿易九年使人出卡搜求逆屬上慮其邀功生事召還京仍回直隸總督任未及兩歲西陲復不靖論者謂那彥成騷內地安集延沒貨產絕貿易所致十一年詔斥誤國肇釁褫職十三年卒宣宗追念平教匪功賜尙書銜依例賜卹諡文毅那彥成遇事有爲工文翰好士雖屢起屢墮中外相望風采子容安容照容安騰戶部主事襲子爵歷侍衛副都統從長齡征回疆有功歷伊犁參贊大臣亂事再起容安率兵四千五百赴援抵阿克蘇遷延不進由和闐繞道又分兵烏什致喀英二城圍久不解褫職速治職大辟尋以以二城

未失從寬改監候罰繳和闔軍需貸死戍吉林父喪釋還數年卒容照以大臣
子子侍衛累擢內閣學士亦從征回疆隨父治善後擢理藩院侍郎容安既獲
罪貶子爵繼因那彥成被譴同職職起歷馬蘭鎮總兵治獄失入復褫爵職以
侍衛從揚威將軍奕經防廣東充庫倫辦事大臣復爲馬蘭鎮總兵咸豐中從
尙書恩華勦捻匪有功加副都統銜以疾回京卒賜卹孫鄂素襲爵

王麟字子振哈達納喇氏滿洲正黃旗人乾隆六十年進士選庶吉士授編修
嘉慶初三遷爲祭酒歷詹事內閣學士纂修實錄久特詔充總纂奏事列名總
裁後入直上書房歷禮部吏部侍郎典會試奉使鞫安徽壽州獄及湖北官銀
匠侵虧錢糧事大吏並被嚴譴後歷赴湖南江西直隸河南按事時稱公正十
二年督安徽學政調江蘇十六年兼右翼總兵坐吏部銓序有誤奪職未幾授
內閣學士兼護軍統領左翼總兵遷戶部侍郎十八年八月車駕自熱河回蹕
迎至白澗先還京會林清逆黨犯禁門率所部擊捕坐門禁懈弛褫職十九年
予三等侍衛赴葉爾羌辦事二十三年加副都統銜充駐藏大臣歷左翼總兵

鑲白旗漢軍副都統邊左都御史禮部吏部兵部尙書道光四年命在軍機大臣上行走六年回疆亂起西四城皆陷阿克蘇辦事大臣長清獨能固守却賊先由玉麟論薦詔特嘉之賜花翎七年兼翰林院掌院學士充上書房總師傅加太子少保八年回疆既定晉太子太保繪像紫光閣上方屢顧西陲以玉麟悉邊務九年特命出爲伊犁將軍疏言浩罕將作不靖請緩南路換防阿坦台汰劣克屢請投順包藏禍心添巡邊兵以備禦伊薩克忠勇能事實令乘機謀之近夷布呼等愛曼恭順重賞以固其心則卡外動靜俱悉詔如議行並令喀什噶爾參贊大臣札隆阿爲之備札隆阿誤信汰劣克等不之疑也十年秋安集延果引浩罕內犯喀什噶爾幫辦大臣塔斯哈率兵出禦遇伏陷歿札隆阿將棄城退守阿克蘇玉麟急疏聞請責長清等速籌糧儲哈豐阿速進攻發伊犁兵四千五百名令容安率之赴援容安至阿克蘇與長清議中途有朵蘭回子梗阻令哈豐阿孝順岱由和闐草地進兵王麟疏劾曰喀英兩城被圍兩月賊勢尙單易於援勦由大路直赴葉爾羌二城之圍自解迂道和闐須一月方

至賊勢漸厚哈豐阿軍未必得力阿克蘇現集兵不下萬人僅以三千人繞路進發留兵坐糜餉糧實屬非計札催十數次該大臣等始以糧運遲延後又稱蒙兵民遺皆不足恃計程裹糧二十日足用後路轉運已源源而來前年克復四城民遺得力渾什巴河之捷土爾扈特出力較多近日璧昌以少勝衆豈沿邊零匪轉不能就地殲除請將長清等嚴行申飭上聽其言仍促哈豐阿進兵及長齡督楊芳胡超等大兵至喀英二城賊已遠遁玉麟疏言賊勢渙散現調官兵不止四萬月需糧萬五千石運費十餘萬兩請停止續調四川陝甘兵並飭回疆各城採買糧餉較之戈壁轉輸節省不止倍蓰從之初張格爾之就禽也回子郡王銜貝子伊薩克實誘致諸夷忌之亂起兵民謀劫掠事洩誅首犯逐流民怨者譏言伊薩克通賊遂圍劫其家並殺避亂回衆二百餘人札隆阿不能制反拊和劾囚之玉麟以伊薩克身膺王封助亂得不償失子孫在阿克蘇家業在庫車豈無顧慮疏陳其可疑命借長齡會鞫得札隆阿懼罪欲殺之以掩迹及委員章京等捏奏迎合誣證狀札隆阿以下坐罪有差復伊薩克爵

職回衆大服時諸臣議回疆事宜玉麟上疏曰閱固原提督楊芳添兵招佃奏稿稱四川總督鄂山有請西四城改照土司之議伏思回疆自入版圖設官駐兵不惟西四城爲東道藩籬南八城爲西陲保障即前後藏及西北沿邊蒙古番子部落皆賴以鞏固若西四城不設官兵僅令回人守土誠恐回性無恒又最畏布魯特強橫轉瞬卽爲外夷所有則阿克蘇又將爲極邊矣其迤東之庫車喀喇沙爾土魯番哈密等城必至漸不安堵以形勢論唇亡則齒寒以地利論喀什噶爾葉爾羌和闐三處爲回疆殷實之區捨沃壤而守瘠土是藉寇兵而齎盜糧也楊芳所謂守善於棄實不易之論至請將喀什噶爾參贊移遷阿克蘇殊非善計該處幅員狹隘不足爲重鎮且距喀城二千里有鞭長不及之患其所陳招佃通商各條則爲治邊良法請用之於是詔發長齡密陳十條及中外奏議交玉麟悉心籌畫十一年偕長齡會疏上定以參贊大臣移駐葉爾羌暨善後諸政具詳長齡傳十二年事定回伊犁調劑番戍官兵以均勞逸惠遠城南瀕河定歲修之例以待種之地租給回民收租充兵食並爲贍孤寡備

差操諸用拓敬業官學舍創建文廟宣宗特頒扁額以重其事邊徼士風漸蒸蒸焉十三年命回京以特依順保代之行至陝西卒於途次上聞震悼優詔賜卹贈太保入祀賢良祠柩至京親臨賜奠設文恭伊鄂爾琿允之特依順保鈕祜祿氏滿洲正白旗人由吉林前鋒長從征廓爾喀有功嘉慶中從長齡勦教匪屢破高天升馬學禮賜號安成額巴圖魯累擢甘肅西甯鎮總兵十八年從那彥成討滑縣教匪力戰數破賊克司寨殲首逆李文成克滑縣執賊渠子雲騎尉世職移勦陝西三才峽匪事平擢黑龍江將軍調烏里雅蘇臺將軍塔爾巴哈台參贊大臣葉爾羌辦事大臣召授正白旗蒙古都統張格爾之亂命赴阿克蘇尋署甘肅提督兼西甯辦事大臣歷綏遠城黑龍江甯夏西安將軍調伊犁承玉麟之後休息邊氓撫馭夷部巴爾楚克諸地屯田漸興酌撤防兵在任五年邊疆無事道光十八年入覲詔嘉其治邊措施悉當加太子太保授內大臣留京供職尋授領侍衛內大臣二十年病請解職未幾卒賜卹如例論曰回疆之役削平易而善後難長齡持重於始老成之謀那彥成力祛積弊

善矣而操切肇釁未竟厥功玉麟以樞臣自請治邊補救綢繆西陲乃得又安
無事紫閣銘勳蓋非倖已

清史稿

列傳一百五十五

楊芳

字 芳 號 子 水 編 字

武隆阿

字 武 隆 阿 號 武 隆 阿 巴 哈 布 長 情

慶祥

字 慶 祥 號 慶 祥 多 隆 武 阿

璧昌

字 璧 昌 號

楊芳字誠齋貴州松桃人少有幹略讀書通大義應試不售入伍充書識楊遇春一見奇之薦補把總從征苗疆戰輒摧鋒洊擢台拱營守備嘉慶二年從額勒登保勦教匪敗張漢潮於南漳賜花翎轉戰川陝常充偵騎深入得賊情地勢額勒登保連破劇寇賴其嚮導之力四年殲冷天祿於人頭堰大軍追餘賊芳以九騎前行至石筍河見賊數千爭渡後逼陡岸左右無路芳遣二騎回報自將七騎大呼馳下賊驚潰陷淺洲中其先渡者無由回救五舟離岸羣賊蟻附舟重每發一矢覆一舟五發五覆俄楊遇春穆克登布至浮馬渡追擊賊盡軍中稱爲奇捷連擢平遠營都司下江營游擊兩廣督標參將五年楊開甲張

天倫趨維南芳以千騎扼東路繞出賊前賊折而西黎明追及見馬蹟中積水猶潢急馳之甫轉山灣見賊擁塞平川芳率數十騎衝突後騎至乘勢蹂躪賊倉卒奔潰禽斬無算賜號誠勇巴圖魯擢廣西新泰協副將尋從穆克登布擊伍懷志連敗之成縣階州賊渡白水河窺四川龍安旁入老林冒雨追擊及之於磨刀石手刃十餘賊傷足墜馬徒步殺賊復傷臂射傷伍懷志大軍乘之大破賊衆仁宗聞而嘉之詔問傷狀六年冉學勝趨甘肅偕札克塔爾要擊於固原賊反奔芳輕騎摧其後隊又敗之於漢江南岸賊由平利走洵陽時張天倫踞高唐嶺芳破之餘賊與學勝合東出楊柏坡芳先至設伏敗之而李彬苟文明高見奇姚馨佐合竄平利彬走南江天倫隨之見奇馨佐入甯羌額勒登保自追之屬芳以南江之賊擊天倫禽其黨張良祖馬德清劉奇復破見奇馨佐於桂門關追及黑河溝禽其黨辛斗擢陝西甯遠鎮總兵又敗李彬於太平賊棄老弱逸獲彬妻及其悍黨冉天璜七年苟文明犯甯陝其黨劉永受宋應伏分布秦嶺北芳由五郎口進殲應伏之衆過半永受遁爲寨民所殺文明尋亦

授首額勒登保入楚檄芳勦陝境餘匪先後禽郭士嘉苟文學等賊黨潰散八年總督惠齡檄芳還勦南山賊芳由洵陽深入冒雨捫崖攀葛彌難無遺遂大搜秦嶺南北陝西賊垂盡忽有李彪者自太白山突出合苟文潤擾洋縣芳截勦勿及坐奪翎頂賊逼川境德楞泰至令芳歸防山內苟文明餘黨自竹谿竄陝芳嚴守漢江却之復翎頂是年秋三省悉平凱撤諸軍甯陝鎮標皆選鄉勇精銳充伍凡五千人號新兵芳馭之素寬十一年芳代楊遇春署固原提督去鎮副將楊之震攝以包穀充糧又鹽米銀未時給衆鼓噪營卒陳達順陳先倫遂倡亂狀之震其黨蒲大芳護芳家屬出而復從賊芳聞變馳赴石泉詔德楞泰率楊遇春等討之秋賊大掠洋縣留壩脅衆盈萬推大芳爲魁攻孝義窺子午谷圍鄠縣急芳馳救鏖戰終夜傷臂且日賊辨爲芳自引去遇春督諸軍戰於方柴關不利芳與遇春計賊尙威舊恩可勸諭單騎入賊曉以順逆利害猶倔強與語數年共生死情聲淚俱下衆感泣願降遂宿賊壘大芳縛達順先倫以獻復率大芳追斬不聽命者朱貴等數百人乃定德楞泰疏請降兵歸伍

被譴責大芳等二百餘人免死伊成羣芳坐馭兵姑息亦褫職遣成明年釋還以守備千總用十五年授廣東右翼鎮總兵調陝西西安鎮母憂去官十八年服闋入都至河南會教匪李文成踞滑縣總統那彥成留之勦賊授河北鎮總兵偕楊遇春克道口進薄滑縣巡撫高杞有兵六千與總統不協戰不力芳說杞盡領其衆文成走踞輝縣司泰偕特依順保追擊之賊死鬪芳手刃退卒大捷以火攻破礮樓文成自焚死予雲騎尉世職大兵墜地攻滑城賊多方禦之歷四十日不得下芳復於西南隅穿穴深入九日而成地雷發城圯殄賊二萬餘滅功優叙調西安鎮移師勦平三才峽匪復勇號調漢中鎮二十年擢甘肅提督道光初歷直隸湖南固原提督六年回疆軍事急芳自請從征許之十月會軍阿克蘇柯爾坪爲要衝芳先進一鼓破之焚回莊斬賊酋伊瞞及安集延僞帥約勒達什大軍無阻七年二月偕參贊楊遇春武隆阿進師三戰皆捷抵喀什噶爾渾河北合擊大破之遂復其城率兵六千趨和闐三月戰於昆拉滿分軍繞賊後夾擊禽賊酋噶爾勒復和闐加騎都尉世職授乾清門侍衛張格

爾已遁命楊遇春借芳出卡掩捕芳軍阿賴檄諸夷部縛獻芳言賊遁愈遠道險餉艱諸夷貪賞妄報不足信至秋詔班師會芳追博巴克達之衆入險遇伏數戰始拔全軍出協領都清阿死之遇春先入關芳代爲參贊遣黑回用間言大兵全退張格爾俟歲將除率五百騎來襲中途覺而反奔芳急馳一晝夜追及於喀爾鐵蓋山殲其從騎殆盡餘賊擁張格爾登山乘騎走芳率胡超段永福等禽之錫封三等果勇侯賜紫韜雙眼花翎晉御前侍衛賜其子承注舉人張格爾械京伏誅加太子太保九年入覲晉二等侯加太子少傅十年浩罕安集延復撥喀什噶爾葉爾羌等城借長齡往勦仍爲參贊兵至賊已遁疏言移城屯田事下長齡等議行尋回鎮十三年四川清溪越巂邊諸夷叛提督桂涌卒於軍以芳代之至則清溪越巂皆平進攻巂邊賊巢斬其酋十二姓熟夷皆降山內獠夷亦就撫與按察使花杰籌治善後晉一等侯逾年諸夷復時出擾降二等侯禔御前侍衛以甘肅總兵候補引疾歸十六年起爲湖南鎮守總兵撫定變兵歷廣西湖南提督二十年海疆事起定海旣陷琦善赴廣東議撫

英吉利要挾攻奪礮臺二十一年春命奕山爲靖逆將軍芳及隆文爲參贊率師防勦奕山等不知兵惟倚芳先至廣州英兵入犯虎門烏涌提督關天培戰死敵兵逼省城嚴備守禦芳見兵不可恃而洋商久停貿易亦願休戰美利堅商人居間請通商詔不許又偕巡撫怡良疏請准港脚商船貿易詔斥有意阻撓怠慢軍心嚴議奪職改留任奕山至戰亦不利四月英艦退收復礮臺奕山等遂請班師芳以老病乞解職溫諭慰之命回湖南本任二十三年許致仕在籍食全俸二十六年卒於家詔念前勞賜金治喪依例賜卹予其諸孫官有差謚勤勇子承注先卒孫恩科襲侯爵芳自勦三省教匪勳名亞於楊遇春至回疆之役以生禽首逆先封侯繪像紫光閣論功超列遇春上漢臣同列者凡九人署固原提督胡超貴州提督余步雲直隸提督齊慎安徽壽春鎮總兵郭繼昌陝西西固營都司段永福陝西馬兵升甘肅甯遠堡守備楊發陝西馬兵升撫標左營守備田大武發大武並從禽張格爾以伍卒躋列異數也胡超四川長壽人初讀書應試不售入伍從征苗疆有功嘉慶中川楚陝教匪起率鄉勇

轉戰屢殲悍賊以勇健名累擢都司坐事奪職入都考充國史館供事十八年
林清逆黨犯禁城手殺數賊大學士勒保薦赴河南軍營從楊遇春勦賊單騎
入賊壘與數十賊搏戰殲其二率旗而出又敗賊於中市率勁騎前驅克道口
復原官克滑城禽賊首上功居最十九年從遇春平三才峽匪殲賊目麻大旗
劉二禽龔貴等賜號勁勇巴圖魯累擢陝西循化營參將道光元年從征叛番
戰博洛托亥烏蘭哈達皆捷夜襲凍雪嶺賊帳擢甘肅永昌協副將駐防西甯
六年回疆事起楊遇春檄赴軍從楊芳攻柯爾坪先破賊於和色爾湖次日攻
北莊持矛步戰殺賊過半陣斬賊首伊闐加總兵銜七年連戰皆捷抵渾河賊
夜來襲擊敗之遂渡河薄賊壘賊大潰四城既復追和闕逸賊出卡至瑪雜敗
之截擊於新地溝盡殲其衆擢四川重慶鎮總兵是年冬追張格爾至喀爾鐵
蓋山舍騎步躡山巔張格爾窮蹙欲自剄超與段永福奪其刀生縛之子騎都
尉世職授乾清門侍衛與功臣宴御製贊有雄勇超羣名實克稱之褒歷署古
北口固原提督授甘肅提督十年浩罕安集延復犯邊超率兵四千馳勦至英

吉沙爾賊已遁遂解喀什噶爾圍分兵追薩漢莊竄匪俘戮殆盡凱旋調固原提督十六年入覲命在御前行走二十一年命率兵二千赴山海關駐防尋以浙江海防急授參贊大臣赴援未行留防天津從郡王僧格林沁視直隸山東海口防務逾年撤防歸伍尋調甘肅提督二十六年以西甯番叛調援不力職仍留騎都尉乞病歸食半俸二十九年卒齊慎河南新野人以武生率鄉團擊教匪入伍隸慶成部下轉戰三省以勇聞比教匪平游擢至陝安鎮右營游擊楊遇春甚器之嘉慶十八年滑縣亂檄慎從征賊踞道口遇春初至直前搏戰慎從之賊氣奪入巢明日慎獨破賊於衛河西岸賊掠中市率騎斷其歸路夾擊毀浮橋遂克道口破桃源集援賊進薄滑縣駐營未定賊萬餘由西北門出來犯力戰相持竟夜遲明城賊二千餘復出慎躍馬衝賊陣中斷乃大潰又破賊新鄉牛市首逆李文成走踞司寨慎由淇縣大廟山右進鏖戰白土岡會攻司寨克之自道口至此凡十三戰叙功最賜號健勇巴圖魯克滑城先登受傷擢副將遂從遇春平三才峽匪授神木協副將歷西安陝安兩鎮總兵道光

元年擢甘肅提督二年西甯插帳番擾河北慎率本標兵迭戰於烏蘭哈達哈錫山落它灘禽斬數百番衆乞降放還河南詔褒獎被珍寶六年從征回疆長齡令充翼長駐守阿克蘇父喪留軍特奇里克愛曼布魯特助逆擾烏什慎戰屢捷禽其酋庫圖魯克七年出哈蘭德卡倫駐倭胡素魯遏賊內犯事平調古北口提督改號強謙巴圖魯十二年病歸起授甘肅提督調四川十七年平雷波叛夷調雲南復調四川二十一年命率川兵五百赴廣東參贊靖逆將軍奕山軍務守佛山鎮楊芳病移守省城會罷戰二十二年赴湖北勦崇陽亂民未至已定命赴浙江會辦揚威將軍奕經軍務駐上虞扼曹娥江移防江蘇鎮江英兵來犯力戰却敵城卒陷退守新豐奔山奔經先後被譴慎奪職留任回四川二十四年出關伍卒於馬邊贈太子太保諡勇毅郭繼昌直隸正定人以行伍從慶成勦教匪於襄陽繼從恒瑞入川擊羅其清冉文偉等於龍鳳坪殲冉文富於馬鞍山功皆最又赴陝甘勦張漢湖擢龍固營都司累遷陝西宜君營參將道光元年赴喀什噶爾換防授定邊協副將調安西協六年換防葉爾羌

抵阿克蘇值亂起駐守托什罕擊敗渡河賊協領都倫布被圍繼昌兵少不能
救借調額爾古倫騎隊三百夜率馳往突賊營殲其酋庫爾班素皮追及河上
禽斬千餘擢總兵賜號幹勇巴圖魯七年從大軍戰大河拐夜襲賊營破之從
復喀什噶爾城追賊至塔里克達坡分兵繞山後狙擊賊驚潰授壽春鎮總兵
調陝西延榆綏鎮十年再赴喀什噶爾勦餘孽還署固原提督十七年調廣東
陸路提督泊海防急往來廣惠間籌守禦二十一年以勞卒段永福陝西長安
人原籍四川以鄉勇從征教匪積功至千總嘉慶十八年滑縣教匪起從楊遇
春轉戰直隸河南克道口司寨復滑縣皆有功復從遇春勦陝西郿縣賊率騎
兵追至柏楊嶺殲賊目麻大旗劉二於陣累擢甘肅張義營都司道光七年從
楊芳征回疆洋阿爾巴特沙布都爾阿瓦巴特三戰皆力賜號利勇巴圖魯張
格爾就禽於喀爾鐵蓋山永福從胡超步上山嶺直前奪其刀手縛之予騎都
尉世職擢參將歷甘肅永固協副將陝西甯夏鎮總兵調貴州安義鎮二十年
命赴廣東防海英吉利兵艦初至永福扼虎門礮擊退之二十二年命赴浙江

佐揚威將軍奕經軍審波鎮海已陷令永福分路往攻漏師期他路先挫永福師不得進遂無功擢廣西提督未赴調浙江未幾卒諡勇毅

武隆阿瓜爾佳氏滿洲正黃旗人提督七十五子嘉慶初以健銳營前鋒從征湖北教匪後隨父勦賊四川功多累擢副都統七十五以病去武隆阿代領所部留川爲勒保所忌父喪乃還京十年授廣州潮州鎮總兵時海盜充斥仁宗以武隆阿勇敢故使治之旣而總督那彥成招降盜首李崇玉子四品銜守備翁而而以武隆阿捕獲聞事覺坐降二等侍衛赴臺灣軍營効力十一年借王得祿等擊蔡牽於鹿耳門敗之遷頭等侍衛授臺灣鎮總兵二十五年母憂回旗尋充喀什噶爾參贊大臣道光元年疏陳八旗生計請以綠營兵半爲旗額由駐防子弟挑補詔斥素言亂政降二等侍衛調西甯辦事大臣三年召還授內閣學士出爲直隸提督授江西巡撫調山東六年臺灣奸民張丙作亂詔武隆阿往督師未行而回疆亂急授欽差大臣與楊遇春同參贊揚威將軍長齡軍務率吉林黑龍江騎兵三千出關七年二月戰於洋阿巴特武隆阿將右軍扼

其前賊敗走追至排子巴特又敗之進克沙布都爾回莊乘勝至渾水河悍賊數千來接迎擊破之斬其酋色提巴爾第等進次阿瓦巴特賊伏精銳以待遣廂師挑戰佯敗武隆阿整隊進以連環槍聚擊別遣藤牌軍由山谷間道衝出賊馬驚却走伏賊自林中出不復成列縱擊之殪賊萬餘斬其酋阿瓦子邁底那爾巴特阿渾等捷聞加太子少保賊壘踞渾河南岸列大礮山穴死守以拒武隆阿軍至不得進日暮偕楊遇春乘風潛渡上游襲賊後賊數進數退卒不支始潰走遂復喀什噶爾城張格爾聞敗先遁詔斥將軍參贊不能生致首逆並被譴奪武隆阿宮銜責禽張格爾以自贖武隆阿病留喀什噶爾城授喀什噶爾參贊大臣詔詢善後方略長齡請以逆裔阿布都哈里管西四城回部事武隆阿亦疏言留兵少則不數戰守留兵多則難繼度支前此大兵進剿幸克捷迅速奸謀始息臣以爲西四城環逼外夷處處受敵地不足守人不足臣非如東四城爲中路不可少之保障與其糜有用兵餉於無用之地不如歸并東四城省兵費之半即可鞏如金甌似無需更守此漏卮詔切責其附和長齡會謀報張

格爾潛居達爾瓦武隆阿率師往擊之侍衛色克精阿等歿於陣上愈怒議革職從寬留任尋以病亟請解職允之命在喀城調理病愈仍署原官八年張格爾就禽免前後吏議尋實授喀什噶爾參贊大臣奏招撫歸順部落額提格訥布魯特安置依劣克達坂地詔以受降易安撫難勉之召回京九年陝甘兵凱撤給鹽糧銀依內地防軍舊例軍士意不滿譁噪那彥成疏言武隆阿戰陣勇敢而多疑少斷未洽人心陝軍器爭實其意存節省拘泥成例所致慮不勝參贊任及至京召對語復掩飾降頭等侍衛尋充和闐辦事大臣十年召還逾年卒武隆阿回疆戰功與二楊相埒以言棄地獲譴未膺優賞宣宗念前勞仍列功臣繪像紫光閣八旗諸將同列者都統威勇侯哈喇阿護軍統領阿勒罕保庫爾烏蘇領隊大臣副都統巴哈布副都統蘇清阿阿克蘇辦事大臣副都統長清塔爾巴哈台參贊大臣達凌阿察哈爾都統安福頭等侍衛巴清德吉林副都統吉勒通阿喀什噶爾幫辦大臣副都統銜額爾古倫頭等侍衛塔爾巴哈台辦事大臣德勒格爾桑頭等侍衛華山泰甯夏副都統伊勒通阿吉林協

領壽昌黑龍江協領鄂爾克彥金陵阿黑龍江總管副都統銜舒凌阿伊犁察哈爾總管烏齊拉爾三等侍衛得勝額吉林佐領烏凌額德成額黑龍江佐領占布阿勒吉訥伊犁錫伯佐領德克精阿伊犁索倫副總管哈丹保伊犁錫伯馬甲防禦銜驍騎校訥松阿舒興阿而回子郡王伊薩克亦與焉哈喇阿瓜爾佳氏滿洲正黃旗人由世襲雲騎尉爲伯父額勒登保嗣襲一等威勇侯授頭等待衛乾清門行走嘉慶十八年從勦滑縣教匪有功賜號繼勇巴圖魯二十一年管御前侍衛兼副都統武備院卿歷護軍前鋒統領道光六年從長齡赴回疆充領隊大臣將騎兵連戰洋阿爾巴特沙布都爾阿瓦巴特禽安集延頭目阿瓦子邁瑪底等復喀什噶爾禽逆屬及從逆伯克阿布都拉安集延頭目推立汗從楊芳破玉努斯於昆拉滿復和闐擡鑲紅旗蒙古都統八年檄送張格爾至京獻俘闕下禮成賜蟒袍大緞十年喀什噶爾復被圍授參贊大臣從長齡視師至則賊已遁命偕楊芳察各城戰守及回衆助逆者捕誅百餘人被脅免罪獎賞有功並如議行留回疆駐守訓練屯兵十二年浩罕遣使進表送

還所掠回民率貿易人進卡哈喇阿受之宣示通商免稅恩詔賜予筵宴事畢
還京臺灣匪起授參贊大臣偕將軍瑚松額往勦未至事平旋師十五年命赴
山陝閱兵擢領侍衛內大臣尋以閱兵不慎降二等侍衛累遷都統二十一年
海疆戒嚴駐防山海關復授參贊大臣偕奕經赴浙江防勦未幾仍回山海關
防守和議成回京授領侍衛內大臣二十五年以病請解職食侯爵全俸二十
九年卒贈太子少保諡剛恪子那銘係榮全襲爵榮全官至副都統自有傳巴
哈布伍彌特氏蒙古正黃旗人以健銳營前鋒藍翎長從征教匪又赴臺灣勦
賊累遷前鋒參領以克滑縣功授右翼翼長擢鎮藍旗蒙古副都統道光五年
出爲哈喇沙爾辦事大臣六年率土爾扈特和碩特蒙古兵援阿克蘇賊潛渡
渾巴什河犯阿城迎擊殲其渠庫爾班素皮被優叙偕提督達凌阿援烏什敗
賊於沙坡樹窩尋撤蒙古兵自請留軍前七年和闐回衆縛賊酋乞降往撫之
洋阿巴特之戰偕哈喇阿率勁騎進擊所向披靡沙布都爾阿瓦巴特連戰皆
力署葉爾羌幫辦大臣凱旋予雲騎尉世職九年授塔爾巴哈台參贊大臣十

二年召還京尋擢江甯將軍治軍有聲十七年卒於官優卹諡勤勇長清鈕祜祿氏滿洲鑲紅旗人內大臣策楞孫副都統特成額子也以廕生入貲銓授兵部主事累遷郎中嘉慶二十四年出爲廣西左江道母憂去官仍爲兵部郎中道光五年加副都統銜充阿克蘇辦事大臣六年張格爾入寇西四城相繼陷長清截留各城換防又發銅廠錢局官兵扼渾巴什河參將王鴻儀戰歿於都齊特賊糾衆五六千自葉爾羌來犯屢撲渡皆擊退距城百餘里波斯圖拉哈爾塔兩地多朵蘭回莊附近抗拒分兵進勦賊復由托什罕渡河偏城二十里長清令數十騎馳揚塵鼓噪東來賊疑大軍至退走河南乃進軍渡河結營賊來攻連敗之禽斬千餘賊始不敢窺河北阿克蘇城小擴關廂開濠築壘爲外郭民回安堵遣兵五百助守烏什爲犄角東四城恃以無恐宣宗初慮長清未諳軍事命特依順保往領其職而長清副之猶未至至是詔嘉長清防勦深合機宜賜花翎子優叙遂寢前命大軍進討滿漢兵三萬數千皆集阿克蘇長清置局供支餼輸鑄錢增驛規畫甚備授鑲白旗蒙古副都統仍留任七年四

城復詔長清於大軍未到力捍孤城厥功甚偉予雲騎尉世職擢其子富春爲主事八年疏言長齡議於阿克蘇添兵一千柯爾坪添兵五百柯爾坪距阿城三百里回衆數萬兵少無益請歸并阿克蘇練成勁旅可以總治兩路所屬乃塔爾達巴罕及阿爾通霍什皆有小路可通伊犁請並封禁從之張格爾就禽械送至京予優叙十年喀什噶爾諸城復告警容安率伊犁兵赴援命至阿克蘇與長清會商進兵疏請分兵和闐烏什待哈豐阿胡超兩路兵至進勦詔斥容安畏葸長清並下嚴議尋原之降二等侍衛仍留任十二年加提督銜充葉爾羌辦事大臣馭夷開屯措施並稱職十四年授烏魯木齊都統逾年召回京尋授福州將軍加太子太保十七年卒晉太子太傅賜金治喪諡勤毅達凌阿佟佳氏滿洲鑲黃旗人以健銳營前鋒從永保勦湖北教匪繼隨楊遇春戰川陝數有功累擢靜甯協副將署西安鎮總兵三才峽匪起率兵四百禦之勝峪八里坪大敗其衆追尤九餘黨至黑水峪攻克之又敗之傅家河擊萬五於辛峪口連敗之萬五率殘卒遁尋就禽加總兵銜擢巴里坤總兵調西安鎮道光

二年擢烏魯木齊提督六年率兵四千援阿克蘇軍次庫車遣錫伯兵扼柯爾坪分守庫車烏什九月與賊夾渾巴什河而軍持數日賊分走烏什借巴哈布迎擊敗之於阿拉爾追至沙坡樹窩破伏賊其自托什罕渡河者方圍協領都倫布營遏副將郭繼昌援路達凌阿還軍馳救奮擊敗之賊爭渡死者相藉河水爲之不流迨長齡至河北已無賊被優叙七年從大軍三戰復喀城駐守葉爾羌署辦事大臣子雲騎尉世職是年秋間邊警調防烏什張格爾就禽回本鎮歷塔爾巴哈台參贊大臣西安將軍十年卒優卹諡武壯哈豐阿富察氏滿洲鑲黃旗人嘉慶初以健銳營前鋒從勦襄陽教匪轉戰川陝累遷前鋒侍衛搜捕南山餘匪甚力事平授貴州定廣協副將擢威寧鎮總兵歷浙江處州陝甘涼州漢中諸鎮道光八年擢烏魯木齊提督十年回疆復警命馳赴阿克蘇偕長清防勦十一月進攻葉爾羌賊營潰潰潛伏哈拉布扎什軍臺分道要擊破之進圍黑色爾禽其酋巴拉特乘勝至英吉沙爾喀什噶爾圍亦解予雲騎尉世職賜號進勇巴圖魯初詔哈豐阿倍道馳援葉爾羌聽容安計繞道和闐

失期議奪職原之責償軍費十之二仍留任擢廣州將軍疏請鑄巨礮百選精銳五百人嚴守望以重海防十四年英吉利兵船二號稱護商入廣州海口縱礮擊之船停黃浦調兵建閘制其出入英曾謝罪事迺解調黑龍江將軍舉發御前大臣高克鼎屬託私書詔獎其持正授內大臣加太子少保請添練馬隊增置官吏補助布特哈生計並允行調西安將軍二十年卒諡愨勤

慶祥圖博特氏蒙古正白旗人大學士保甯子授藍翎侍衛嘉慶十三年襲三等公爵授散秩大臣鑲白旗蒙古副都統兼正藍旗護軍參領尋授理藩院侍郎調工部十八年率京營兵從那彥成勦滑縣教匪凱旋擢正黃旗漢軍都統歷熱河烏魯木齊都統二十五年授伊犁將軍八月逆回張格爾擾喀什噶爾官軍勦捕乃引去參贊大臣斌靜以聞不言釁由宣宗疑之命慶祥往勘得斌靜縱容家奴凌辱伯克交通姦利狀襍速論罪疏陳善後六事又密請羈縻浩罕部落許遣使入覲以安夷心詔俞之道光五年夏張格爾復擾邊內地回戶多與通幫辦大臣巴彥巴圖率兵出塞掩之不遇即縱殺游牧布魯特而還其

曾汰列克追獲官軍於山谷賊遂猖獗參贊大臣永芹職命慶祥代之慶祥至誤信奸回阿布都拉反爲賊耳目六年夏張格爾遣其黨赫爾巴什潛赴赫勒薩雅克愛曼糾合夷衆復令奇比勒迪至巴雅爾開渠占地遣兵禽斬之張格爾率衆五百由開齊山路突至回城拜其先和卓木之墓回人所謂瑪雜也慶祥令幫辦大臣舒爾哈善及領隊大臣烏凌阿往勦夜雷雨張格爾潰圍走白帽回衆紛起應之張格爾復由大河沿合衆數萬進犯喀城慶祥盡調各營卡兵爲三營令烏凌阿穆克登布分率之迎戰先後沒於陣先是張格爾求助於浩罕約四城破分所掠且割喀城以報及見官軍無援悔欲背約浩罕曾怒自以所部攻城未下尋引去張格爾追擊之收其降衆數千遂益強八月圍喀城凡七十日城陷慶祥自經死事聞贈太子太保晉封一等公兼雲騎尉世職以子文輝嗣贈壯直祀昭忠祠逾年回疆平詔於喀什噶爾建昭忠祠祀之舒爾哈善烏凌阿穆克登布俱從祀御製憫忠詩勒諸石八年張格爾伏誅命其子文輝看視行刑摘心於墓前致祭舒爾哈善葛哲勒氏滿洲鑲白旗人以驍

騎校從征川陝教匪有功子巴圖魯勇號累擢布特海烏拉協領克潛縣加副都統銜坐事褫職道光初子三等侍衛充庫爾喀喇烏蘇領隊大臣六年張格爾入犯調喀什噶爾幫辦大臣與賊戰身先士卒受槍傷仍磨兵前進殺數百人城陷被戕子騎都尉世職烏凌阿瓜爾佳氏滿洲鑲白旗人山前鋒從征教匪累擢頭等侍衛道光三年授伊犁領隊大臣正紅旗蒙古副都統六年賊逼喀城慶祥檄令回援遇賊於渾河力戰至晡沒於陣贈都統銜諡莊武子騎都尉雲騎尉世職穆克登布李氏滿洲鑲紅旗人伊犁駐防由委前鋒校累擢協領道光元年慶祥密令誘捕張格爾於托雲山內獲其黨蒙達拉克等子議叙二年充庫爾喀喇烏蘇領隊大臣調伊犁五年率兵至喀什噶爾駐防圖舒克塔什卡倫張格爾犯喀城撤兵回戰於七里河死之贈都統銜諡壯節子騎都尉兼雲騎尉世職多隆武烏素爾氏滿洲鑲白旗人山筆帖式補驍騎校累擢協領道光四年加副都統銜充葉爾羌幫辦大臣六年喀什噶爾被圍急遣兵赴援賊由阿色爾布依岳坡爾湖而南分兵防禦奸回阿布都拉等潛通賊

多隆武盡誅之喀英兩城相繼陷賊越葉爾羌參將吳亨佑扼單板橋戰歿遂由黑子鋪入防師盡燬回兵半爲賊脅伊犂道梗不能救葉城乃陷多隆武死之依都統例賜卹於葉爾羌建專祠子騎都尉兼雲騎尉世職葉爾羌辦事大臣印登英吉沙爾領隊大臣蘇倫保和崗領隊大臣奔淵幫辦大臣桂斌同殉難追論死事諸臣並贈卹有差惟喀什噶爾幫辦大臣巴彥巴圖坐濫殺陷師奪其卹典

壁昌字東垣額勒德特氏蒙古鑲黃旗人尙書和瑛子由工部筆帖式銓選河南陽武知縣改直隸策強擢大名知府道光七年從那彥成赴回疆佐理善後壁昌有吏才以父久官西陲熟諳情勢事多倚辦九年擢頭等侍衛充葉爾羌辦事大臣壁昌至官於奏定事宜復有變通清出私墾地畝新糧萬九千餘石改徵折色撥補阿克蘇烏什喀喇沙爾俸餉餘留葉城充經費以存倉二萬石定爲額貯歲出陳易新於是倉庫兩益葉爾羌喀拉布札什軍臺西至英吉沙爾察木倫軍臺中隔戈壁百數十里相地改驛於黑色熱巴特增建軍臺開渠

水種苜蓿土馬大便所屬塔塔爾及和沙瓦特兩地新墾荒田皆同戶承種奏免第一年田賦以恤窮氓新建漢城始與回城隔別百貨輻輳倍於往時以回城官房易新城南門外曠土葺屋設肆商民使之訪問疾苦聯絡漢回人心益定十年八月浩罕糾諸部寇邊圍喀什噶爾英吉沙爾兩城遂犯葉爾羌容安率援師遷延不至壁昌撫諭回酋同心守禦分扼科熱巴特亮噶爾諸要隘賊萬餘撲城迎戰於東門外擊破之賊宵遁詔嘉其援師未至之先即獲全勝加副都統銜尋授鑲黃旗漢軍副都統自九月至十一月賊復三次來犯迭擊敗走之最後賊攻城相持五日而哈豐阿援兵至賊望風遁追破之於哈拉布札什越數日進兵英吉沙爾而喀什噶爾之賊已飽颺出塞大軍至則無賊矣壁昌素得回衆心是役尤得阿克木伯克阿布都滿之助賴以戰守事定奏請仍襲其祖郡王封爵長齡玉麟奉命會籌善後事盡諮於壁昌十一年擢參贊大臣改駐葉爾羌遂專回疆全局興喀拉赫依屯田招練民戶五百人修築築壩以牌博爲界不侵回地凡墾屯地二萬二百四十畝十二年和闐回民塔瓦克

戕伯克多拉特依斯瑪伊勒等爲亂捕其黨盡誼諸法疏言長齡等奏增南路防兵三千屯巴爾楚克因其地築城未竣遂以二千人分屯葉略二城二城形勝較巴爾楚克尤要請以暫時分屯之兵永爲定額喀城更增綠營兵三千五百分屯七里河爲犄角葉城增烏魯木齊滿洲兵五百綠營兵一千詔從之十三年召還京十四年復出爲烏什辦事大臣歷涼州副都統阿克蘇辦事大臣察哈爾都統緣事降調充伊犁參贊大臣授陝西巡撫擢福州將軍二十三年署兩江總督尋實授英吉利和議初成璧昌奏設福山鎮水師總兵沿江形勢扼險設防請於五龍北固兩山及圖山關鵝鼻嘴修築礮臺礮隄是爲籌江防之始言官請團練鄉兵以窒碍無益奏寢其議淮北已改票鹽御史劉良駒疏請推廣於淮南試行疏言其不便略謂淮南地廣引多價昂課重行銷之不齊堵緝之難易與淮北迥別竈戶成本不能驟減至三四倍民販更非一時可集而課項皆常年要需如改票議行應納課銀孰肯再繳應追積欠亦當豁免此後攤帶錢糧亦將盡停利猶未見害已先形爲今之計但能肅清場鹽以杜偷

漏之源整飭口岸以廣行銷之路嚴禁浮濫以除在官之益顧惜成本以冀商
力之紓庶准榷漸有起色疏入如所請二十七年入覲留京授內大臣復出爲
福州將軍數月以疾請回旗咸豐三年粵匪北犯逼近畿命爲巡防大臣四年
卒贈太子太保諡勤襄子恒福直隸總督孫錫珍同治七年進士由翰林院編
修歷官吏部尚書當壁昌初蒞葉爾羌實繼恒敬之後恒敬原名恒敏伊爾根
覺羅氏滿洲正藍旗人嘉慶初爲四川打箭鑪同知治軍需糧餉有功擢綏定
知府累遷江寧布政使道光初授光祿寺卿充哈密辦事大臣大軍征張格爾
命督辦轉運鑄錢購糧增設臺站供軍無缺七年調烏什辦事大臣命赴喀什
噶爾幫辦善後授葉爾羌辦事大臣遷建新城於罕那里克勘墾官荒田歲增
糧供防兵二千口食復於西北隅墾荒地一百餘里水土肥饒疏請試墾壁昌
至始墾成八年乞病歸尋授正白旗漢軍副都統出爲西甯辦事大臣十二年
卒

論曰平定回疆多用川楚陝舊將百戰之餘以臨犬羊烏合摧枯拉朽旬月而

告功成何其易哉及後海疆事起授鉞分麾莫能禦侮蓋所當堅脆不同而勝之不可以狃也楊芳一時名將之冠差知彼已晚伍庸帥依違召譏其以恩禮終猶爲幸焉慶祥心知危局身殉孤城壁昌力捍寇氛卒安邊徼回疆安危之所繫也並著於篇

清史稿

列傳一百五十六

林則徐

鄧廷楨

道州人

林則徐字少穆福建侯官人少警敏有異才年二十舉鄉試巡撫張師誠辟佐幕嘉慶十六年進士選庶吉士授編修歷典江西雲南鄉試分校會試遷御史疏論福建閩安副將張寶以海盜投誠宜示裁抑以防驕蹇被嘉納未幾出爲杭嘉湖道修海塘興水利道光元年聞父病引疾歸二年起授淮海道未之任署浙江鹽運使遷江蘇按察使治獄嚴明四年大水署布政使治賑募丁母憂命赴南河修高家堰隄工事竣回籍六年命署兩淮鹽政以未終制辭服闋補陝西按察使遷江甯布政使父憂歸十年補湖北布政使調河南又調江甯十一年擢河東河道總督疏陳楛料爲河工第一弊數親赴各廳察驗又言碎石實足爲埽工之輔應隨宜施用十二年調江蘇巡撫吳中泔饋奏免運賦籌撫郵前在藩司任議定賑務章程行之有效至是仍其法宿弊一清賑竣乃籌積

穀備荒清釐交代盡結京控諸獄考覈屬吏疏言察吏莫先於自察必將各屬大小政務逐一求盡於心然後能以驗羣吏之盡心與否如大吏之心先未貫徹何從察其情偽臣惟持此不敢不盡之心事事與僚屬求實際詔嘉之勉以力行先是總督陶澍奏濬三江則徐方爲臬司綜理其事旋以憂去至是黃浦吳淞工已竣則徐力任未竟者劉河工最要撥帑十六萬五千有奇白茆次要官紳集捐十一萬兩同時開濬以工代賑兩河舊皆通海易淤且鑿河工鉅改爲清水長河與黃浦吳淞交匯通流各於近海修閘建壩潮汐泥沙不能壅入內河漲則由壩洩出歸海復就原河逢淤取直節省工費三萬餘兩用濬附近劉河之七浦河及埭近白茆之徐六涇東西護塘諸河又濬丹徒丹陽運河寶帶橋柳澱諸工以次興舉爲吳中數十年之利兩署兩江總督十七年擢湖廣總督荆襄歲罹水災大修隄工其患遂引整頓鹽課以減價敵私無成效專嚴緝私之禁銷數大增湖南鎮軍兵悍數眾巡閱撫馭密薦總兵楊芳擢爲提督移駐辰州慎固苗疆屯防十八年鴻臚寺卿黃爵滋請禁鴉片烟下中外大

臣議則徐請用重典言此禍不除十年之後不惟無可籌之餉且無可用之兵
宣宗深體之命入覲召對十九次授欽差大臣赴廣東查辦十九年春至總督
鄧廷楨已嚴申禁令捕拏烟犯洋商查頓先避回國則徐知水師提督關天培
忠勇可用令整兵嚴備檄諭英國領事義律查繳烟土驅逐躉船呈出烟土二
萬餘箱親莅虎門驗收焚於海濱四十餘日始盡請定洋商夾帶鴉片罪名依
化外有犯之例人即正法貨物入官責具甘結他國皆聽命獨義律枝梧未從
於是閱視沿海礮臺以虎門爲第一門戶橫嶺山武山爲第二門戶大小虎山
爲第三門戶海道至橫嶺分爲二支右多暗沙左經武山前水深洋船山之出
入關天培創議於此設木排鐵練二重又增築虎門之河角礮臺英國商船後
至者不敢入義律請令赴澳門載貨冀開烟私嚴斥拒之滑溜尖沙坳外洋
會有英人毆斃華民抗不交犯遂斷其食物撤買辦工人以困之七月義律藉
索食爲名以貨船載兵犯九龍山礮臺參將賴恩爵擊走之疏聞帝喜悅報曰
既有此舉不可再示柔弱不患卿等孟浪但戒卿等畏葸御史步際桐言出結

徒盧文則徐以彼國重然諾不肯出結愈不能不向索取持之益堅尋義律浼
澳門洋會轉囑令載烟之船回國貨船聽官查驗九月商船已具結進口義
律遣兵船阻之開礮來攻關天培率游擊麥廷章奮擊敗之十月又犯虎門官
涌官軍分五路進攻六戰皆捷詔停止貿易宣示罪狀飭福建浙江江蘇戡防
海口先已授則徐兩江總督至是調補兩廣府尹曾望顏請罷各國通商禁漁
船出洋則徐疏言自斷英國貿易他國喜此盈彼絀正可以夷制夷如概與之
絕轉恐聯爲一氣粵民以海爲生概禁出洋其勢不可終日時英船寄棧外洋
以利誘奸民接濟銷烟二十年春令關天培密裝礮械雇漁船蛋戶出洋設伏
候夜順風縱火焚燬附夷匪船接濟始斷五月再焚夷船於磨刀洋諜知新來
敵船揚帆北嚮疏請沿海各省戒嚴又言夷情詭譎若逕赴天津求通貿易請
優示懷柔依嘉慶年間成例將遞詞人由內地送粵六月英船至廈門爲閩浙
總督鄧廷楨所拒其犯浙者陷定海掠甯波則徐上疏自請治罪密陳兵事不
可中止略曰英夷所憾在粵而滋擾於浙雖變動出於意外其窮蹙實在意中

惟其虛僞性成愈窮蹙時愈欲顯其榮鸞試其恫喝甚且別生秘計冀售其奸一切不得行仍必帖耳俛伏第恐讓者以爲內地船廠非外夷之敵與其曠日持久不如設法羈縻抑知夷情無厭得步進步威不能克患無已時他國紛紛效尤不可不慮因請戴罪赴浙隨營自効七月義律至天津投書總督琦善言廣東燒烟之釁起自則徐及鄧廷楨二人索價不與又遭詬逐故越境呈訴琦善據以上聞上意始動時英船在粵窺伺復連敗之蓮花峯下及龍穴洲捷書未上九月詔曰鴉片流毒內地特遣林則徐會同鄧廷楨查辦原期肅清內地斷絕來源隨地隨時妥爲辦理乃自查辦以來內而奸民犯法不能淨盡外而輿販來源並未斷絕沿海各省紛紛徵調糜餉勞師皆林則徐等辦理不善之所致下則徐等嚴議飭即來京以琦善代之尋議革職命仍回廣東備查問差委琦善至義律要求賠償烟價廈門福州開埠通商上怒復命備戰二十一年春予則徐四品卿銜赴浙江鎮海協防時琦善雖以擅與香港速治和戰仍無定局五月詔斥則徐在粵不能德威並用褫卿銜遣戍伊犁會河決開封中途

奉命襄辦案決二十二年工竣仍赴戍而浙江江南師屢敗是年秋和議遂成二十四年新疆興治屯田將軍布彥泰請以則徐綜其事周歷南八城潯水源闢溝渠墾田三萬七千餘頃請給回民耕種改屯兵爲操防如議行二十五年召還以四五品京堂候補尋署陝甘總督二十六年授陝西巡撫留甘肅偕布彥泰治叛番禽其酋二十七年授雲貴總督雲南漢回互鬪焚殺歷十數年會保山回民控於京漢民奪犯燬官署拆瀾滄江橋以拒饋道不能制則徐主止分良莠不分漢回二十八年親督師往勦途中聞彌渡客回滋亂移兵破其巢殲匪數百保山民間風股粟縛犯迎師誅其首要散其脅從召漢回父老諭以恩信遂搜捕永昌順甯雲州姚州歷年戕官諸重犯威德震洽邊境乃安加太子太保賜花翎二十九年騰越邊外野夷滋擾遣兵平之以病乞歸逾年文宗嗣位疊詔宣召未至以廣西逆首洪秀全稔亂授欽差大臣督師進勦並署廣西巡撫行次潮州病卒則徐威惠久著南服賊聞其出皆震悚中道遽歿天下惜之遺疏上優詔賜卹贈太子太傅諡文忠雲南江蘇並祀名宦陝西請建專

祠則徐才識過人而待下虛衷人樂爲用所莅治績皆卓越道光之季東南困於漕運宣宗密詢利弊疏陳補救本原諸策上畿輔水利議文宗欲命籌辦而未果海疆事起時以英吉利最強爲憂則徐獨曰爲中國患者其俄羅斯乎後其言果驗

鄧廷楨字嶸筠江蘇江甯人嘉慶六年進士選庶吉士授編修屢分校鄉會試稱得士十五年授臺灣遺缺知府浙江巡撫蔣攸銛請留浙補甯波母憂歸服闋補陝西延安府歷榆林西安以善折獄稱平反韓城南鄭冤獄又全同州廢婦母子陝民歌頌傳播京師二十五年超擢湖北按察使權布政使沿江民田歷年沈沒而賦額仍在爲民累悉請免之道光元年遷江西布政使以前在西安失察渭南令故出縣民柳全璧殺人罪罪誤奪職議戍軍臺宣宗知其無私特免遣戍予七品銜發直隸委用尋授通永道四年擢陝西按察使遷布政使六年擢安徽巡撫自嘉慶時安徽多大獄風頽兩郡俗尤悍常以兵定責繳兵械私藏尙多廷楨乃立限責成保長逾限及私造者置之法任吏皆得人刁悍

之風稍戢舊例穎州屬三人以上凶器傷人者極邊烟瘴充軍僉妻發配廷植疏言悍俗誠宜重懲婦女顧名節多自殘求免或自盡傷生情在可矜請停其例遇水災親乘舟勘賑修復安豐塘考陂水門潯鳳陽沫河加築隄閘嚴緝捕屢獲劇盜以獲南河掘隄首犯陳端詔嘉獎治皖十載政尙安靜境內大和十五年擢兩廣總督鴉片烟方盛行漏銀出洋爲大患十六年英吉利商人以蓋船載烟廷植禁止不許進口猶泊外洋嚴旨驅逐沿海奸民勾結禁令猝難斷絕廷植與提督關天培整備海防迭於大嶼山口急水洋獲蟹艇載銀鉅萬盡數充賞破獲囤煙私販十八年英船載屬番男婦五百餘人赴澳門居住驅令回國詔下禁烟議疏言法行於豪貴則小民易從令嚴於中土則外貨自緝十九年林則徐奉命至廣東廷植與之同心協力盡獲壘船積烟焚之嚴私販之罪臨以兵威屢戰皆捷事詳則徐傳奸民因失業徧騰蜚語廷植疏陳略曰臣緝懲鴉片三載於茲豪猾之徒刑僇遁逃身家旣失怨讟遂興查檢爲希旨掩捕爲貪功偵伺爲詭謀推鞠爲酷罰誣以納賄目以營私譏建議爲急於理

財嘗新例爲輕於改律狂悖紛焚無非爲烟匪洩憤詔慰勉之調兩江雲貴皆未赴閩防方急遂調閩浙總督購洋礮十四運閩以閩洋無內港臺礮建於海灘沙浮不固奏改爲礮墩裝沙堆築外護以船募水勇飾商船出洋巡緝二十一年三月英船窺廈門遣提督程恩高等迎敵於梅林澳擊走之奸民勾通出洋運烟分責水陸師嚴緝遇即攻擊迭有殲禽六年敵船駛入廈門求通貿易阻之遂開礮來撲礮臺參將陳勝元守備陳光福奮擊斃其前隊數人發礮傷敵甚衆乃遁其分犯浙洋者陷定海廷植率師赴勦行次清風嶺詔以閩防緊要止其赴浙遂駐兵泉州招募練勇疏言英船二十餘艘聚泊定海內地師船恐難驟近必改造堅大之船多配礮火間道而進方能制勝九月詔以廷植等在粵辦理不善轉滋事端與林則徐同奪職二十一年琦善撤沿海兵備虎門失守復追論廷植久任兩廣廢弛營務與則徐同戍伊犁二十三年釋還尋予三品頂戴授甘肅布政使議清查荒地親往歷勘由銀州東盡洮隴西極酒泉得田一萬九千四百餘頃又番貢地一千五百餘頃甯夏馬廠地歸公一百餘頃

熟地升科荒者招墾詔嘉其勳復二品頂戴二十五年擢陝西巡撫署陝甘總督番匪擾蒙部遣兵邀擊於硫磺溝平之尋回任二十六年卒於官廷植治行早爲時稱屢蹟屢起宣宗知之深故卒用之績學好士幕府多名流論學不輟尤精於音韻之學所著筆記詩詞並行世子爾恆亦官至陝西巡撫自有傳當廷植之去福建也適年英兵復至陷廈門遂窺臺灣總兵達洪阿偕臺灣道姚瑩屢却之及和議成同獲譴達洪阿字厚庵富察氏滿洲鑲黃旗人由護軍游擢總兵道光十五年調臺灣鎮十八年勦嘉義縣匪沈和等賜花翎加提督銜二十一年八月英兵船至雞籠海口達洪阿與姚瑩督兵禦之副將邱鎮功燃巨礮折其桅敵船衝礁破碎擒斬甚衆賜雙眼花翎九月敵船再至雞籠三沙灣復卻之勦平嘉義鳳山土匪予騎都尉世職二十二年敵船犯淡水彰化間之大安港欲入口達洪阿謀於姚瑩瑩曰此未可與海上爭鋒必以計殲之乃募漁舟投敵任鄉導誘令從土地公港入攔淺中流伏發大破之落水死者無算其竄入漁舟者擊斬殆盡詔嘉臺灣三次破敵達洪阿等智勇兼施大揚國

威賜號阿克達春巴圖魯加太子太保銜敵船游奕外洋乘間掩擊迭有俘獲遂不復至既而英師再陷定海浙江江蘇軍屢挫乃議和英將漢鼎查訴稱臺灣所戮皆遭風難民達洪阿等冒功捏奏命總督怡良赴臺灣查辦至即傳旨革職逮問兵民不服勢洵達洪阿等撫慰乃散至京下刑部獄尋釋之予三等侍衛充哈密辦事大臣歷伊犁參贊大臣西甯辦事大臣二十六年偕陝甘總督布彥泰勦平黑錯寺番匪三十年授副都統咸豐元年從大學士賽尙阿勦賊虜西破紫金山西南礮臺以病回京三年粵匪犯畿輔率八旗兵赴臨洺關進勦從欽差大臣勝保擊賊靜海四戰皆捷追至下西河副都統佟鑑天津知縣謝子澄陳亡詔斥達洪阿先退革職留營効力四年敗賊獻縣復原官尋追賊阜城受傷卒於軍贈都統銜子騎都尉兼一雲騎尉世職諡壯武姚瑩自有傳

論曰林則徐才略冠時禁烟一役承宣宗嚴切之旨操之過急及敵氛蹈瑕他犯遂遭譏屏斥論者謂粵事始終倚之加之操縱潰裂當不致此則徐瀕謫疏

陳白道光元年以來粵關徵銀三千餘萬兩收其利必防其害使以關稅十分之一製礮造船制夷已可裕如誠爲諫論惟當時內治廢弛外情隔膜言和言戰皆昧機宜其禍豈能倖免哉鄧廷楨與則徐同心禦侮克保嚴疆若達洪阿姚瑩邵敵臺灣固由守禦有方亦因敵非專注朝廷皆不得已而罪之諸人卒皆復起而名節播宇內煥史冊矣